

► *Nos museonan tin mester di mas atencion di nos gobierno*

Mester wordo ehecuta ley riba conservacion di sitionan y obhetonan arqueologico

ORANJESTAD - Turesnan cu a haya chens pa bishita nos museonan durante nos festividad di Dia Nacional di Himno y Badera, a aprecia y balora e balor historico cu nan tin. Nos tin un Museo Numismatico cu un coleccion di moneda cu ta haci di dje un di e museonan mas grandi di nos area. Nos tin un Museo Historico den Fort Zoutman cu vario elemento masha interesante cu ta testimonio di nos historia. Nos tin un Museo Arqueologico cu un variedad di obhetonan di e prome actividad humano riba nos isla. Nan ta obhetonan diferente fasenan di nos prehistoria di e prome habitantenan na Aruba. Otro museo cu a haya masha atencion y tabata uno masha yamativo mes ta esun di Museo di Antiguedad cu actualmente ta carga e nomber di su fundador Juan Mario Odor (q.e.p.d.). Tur e variedad di museo aki ta masha atractivo pa nos hendenan local pero pa nos bishitantenan tambe. Nos museonan ta un atractivo turistico pero tambe un banco di balor incalculabel cu ta desmuestra cu nos pais Aruba tin un rais y un patrimonio historico basta rico. Pero lamentablemente, tur e sitionan aki ta masha escondi y plama den otro cu dificilmente nan por hala atencion di nos turistanan.

⌘ Durante e develacion di un plakaat na Museo di Antiguedad na Tarabana, Minister di Cultura, sr. Ramon Lee a ofrece na e famia Odor pa muda e Museo Numismatico pa e casita historico cu a wordo restaura banda di parkinglot di Arubus. E ta un bon iniciativa, sin duda pero p.e. e mesun Museo di Antiguedad tambe por resulta masha atractivo den e sitio aki. Nos tin entendi cu e articulonan aki ta propiedad di famia Odor, pero bale la pena si nan por yega na un entendimento manera esun di Museo Numismatico pa nan ricibi subsidio di Gobierno.

Otro aspecto cu a hala atencion di esnan cu a bishita e museo aki ta cu nan ta conta cu un cantidad di obheto arqueologico, mientras cu nos tin caba un Museo Arqueologico destina pa exhibi tur e piezanan di balor arqueologico. Esaki ta muestra cu no tin un unidad di criterio entre e museonan p'asina nan por traha mas organisa y mas uni na beneficio di nos patrimonio historico. Tur e hendenan cu ta involucra den maneho di nos museo sigur tin amor pa e trabao cu nan ta haciendo y nan lo por yega na un bon entendimento p'asina traha mas organisa pa loke ta e piezanan di balor arqueologico.

Algo cu nos mester condena ta cu tin hende cu tin nan propio

coleccion di obhetonan arqueologico sin cu nan sa e balor cu esaki tin pa loke ta nifica nos historia. Aparentemente ley t'ey pa loke ta p.e. conservacion y defensa di obhetonan arqueologico, sin embargo e ley no ta wordo ehecuta. Es decir tur obheto arqueologico haya riba nos teritorio ta propiedad di e pais Aruba, y esun cu ta hayele tin e responsabilidad pero e compromiso ciudadano cu nan pais di entrega esaki na e autoridadnan concerni of informa nan riba cualkier hayazgo arqueologico descubri. E paisnan cu un balor arqueologico manera Grecia, Egipto y Roma, e ley aki cu ta pone beslag riba cualkier obheto historico cu ta wordo haya dor di un particular ta existi tambe. Den caso cu nan ta haya un persona cu piezanan arqueologico esaki ta wordo confisca y pone na disposicion di e instancia concerni cu ta percura di defende y conserva e patrimonio historico di e pais.

